

Yuda

Yaijézé ac.

¹Yesu Kristoac welenqege icya, Yakoboac munia, ni Yudanéŋ, Anutu maŋgocninawac goi héihéiiguc héihéré énécmima, Kristo Yesuac niŋ wamma héŋgaleŋ waŋ énécmimia, onac mia kiwi yomi oénécmizua. ²Onac muru goi héihéiya, luaeya, zéma ala siŋa imi kindindiŋnec he énécmimac.

Kiwi ic ikora.

³Kokoc sorochéčna késpedes igucnec nénépésiyu neŋaŋ momac yanda késa kecziŋ aŋgéŋ titinina imuac mia kiwi oénécmimaŋ zé ewa siŋna ogicma waŋ néŋu seliseli wamma keru. Yesu imi ic téréya neŋaŋ niŋac hatac momacgucnec metecgédacma ninzéŋ ninzéŋ mihicŋi nénécmiyec. Imuac niŋ ninzéŋ ninzéŋ imuaru naŋselimu niŋac meme seli ac oénécmimaŋac hezac zéma niŋi. ⁴Hénia imi suginaiguc ic tosara éléŋ keremma kecgic ionac ewa goro wamma ozua. Ic imuhucya niŋgési waŋ énécmimuac niŋ becarunec ackuazéc yomuhuc ogic hezac; Anutuac eeya ménda héianzu imi eneŋ ewa hiaya meleŋgic kaiseroac buŋa waŋanzac. Imuhuc wamma ieneŋ imi momacguc kekera Miŋ Kewunina momacguc Yesu Kristo qaecgé érécmianzu.

⁵Ini suruc yomi nindaczu, néŋ niniŋgina héiqeli énécmimaŋ zé wanzua. Becnec Miŋ Kewuninanéŋ Israel ic tuŋ Izipte baec igucnec metecgé énécmiyec, néŋ andiaiguc ara ménda ninzéŋgégic imi unudarec. ⁶Waŋu kua meme uŋahéra^a tosara nanaŋgina séciguc ménda naŋkecma tatacgina waima keŋgic imi zégési nalé yanda hamac nalé sura imuac séc tacmu niŋac heheseli qatéénécmima siŋi tunumaŋ yandaiguc onoporecac keczu. ⁷Waŋu Sodom zéma Gomora^b zéma ama lelec lelec tacma keŋec imuac ic embac imi acguc séc imuhucyanec kaisero wamma baecac siŋ hénia méŋac^c wamma méndacma keŋgic geric hémbénaŋanéŋ naec énécmima kawéya qeyu sésécac naŋanzac.

^a 1:6 Hén 6:2 ^b 1:7 Sodom zéma Gomora; Abarahamac naléiguc Miŋ Kewunéŋ ic embac ionac késpedes niŋac ama areŋa yanda yomi gericnéŋ odarec. ^c 1:7 Icnéŋ ic alayaguc kaisero waŋgic imuac zézéya.

⁸ Waŋu ic suginaiguc éléŋ haréma keczu ieneŋ imuhucnec gauguc héhéŋ tanec kecma séwiginanéŋ haka biria wamma miŋ kewugina qahac tanec kecma qac buŋa téréya edamuya imi zébirianzu. ⁹ Kua meme uŋa kiwagina Mikael iminéŋ Moseac qamora niŋac Biria miŋinaguc héré héré amuma zéqeqetali waŋoc. Imuhuc wamma Biria miŋinawac zéбири wammimaŋ zé niŋu néhéliyu yomuhuc sac zéyec; Miŋ kewunéŋ ac zégémmac. ¹⁰ Néŋ ic yomi eneŋ iwawai imuac me imuac hénia ménda niŋasarigic séc, sicsaoc zéma mematiti wammianzu. Waŋu haséŋ yaŋ ésécnec ménda niŋgésima séwiac siŋ méndacma birianzu. ¹¹ Ieneŋ Kainac héna^d méndacanzu, waŋu soukiwa niŋac wamma Balamac haka^e waŋsoho sohoya mihiçniwiŋ zé usuŋnec keŋanzu. Waŋu Korawac ac qeqe hakaiguc^f mebiri amuanzu. Imuac niŋac imi eneŋ saecginaguc! ¹² Ic ieneŋ onaru toroqe énécmima onac ségiségi ariaciguc momacnec tacma gamugina qahac nezeléléŋ wamma ariac imuac kiwa néanzu. Kekecgina tanec imi rama galeŋ eŋaŋ séwigina sac galeŋgé amuanzu imuhucya, hosusu méŋ luhucnéŋ mihilaŋgéyu kia qahac eŋ hama keŋanzac imuhucya, waŋu ic hésa humuma humudaru zaliacnec qéziqézia wamma héla qahac ai yawuŋ mihicŋianzac imuhucya ésécnec. ¹³ Konduŋ temboŋa geriwiguc tanec gamugina héndéŋ qéndemma sépéçgéanzu imuhucya, sikilao héna sigima keŋkeŋa imuhucya, siŋi tunumaŋ nalé tetcgia qahac hezac iminéŋ ionac buŋa wanzac.

¹⁴ Adamwac sac kitichéra hicŋjima hama kecgic hicŋjsai areŋhéra 7 waŋec nalé imuaru Enoko hicŋjyec waŋu inéŋ mia ic biria imuhucya ionac mia biaŋac ara yomuhuc zéyec. Héŋgic, Miŋ Kewu imi ic téréya tauseŋa tauseŋa ionac suginaiguc namma mayec. ¹⁵ Inéŋ icya icya niŋgésima ic embac Anutu eeya ménda héianzu ionac haka eebipiya qahac imuhucya zéma késpedesic ic Anutu eeya ménda héimianzu ionac acgina zéraguc imuhucyawac késpedesic ginaguc zéma zétéçgé énécmimaŋ zé mayec. ¹⁶ Ic imuhucya ieneŋ imi diric doroc ac biria zéma ac zérac zérac zéanzu. Imuac séwiac siŋ méndacma kuayanéŋ tétéc qeqe ac zéma imuac me imuac memaŋ zé wamma mepé qepési ac ikora énézéanzu.

Goro ac toroqeqeya.

¹⁷ Ala soroçhéçna ini mia Miŋ Kewunina Yesu Kristoac Méliméli ichéra ieneŋ walac ac énézéçic imuac niŋqelima keçmu. ¹⁸ Ieneŋ yomuhuc

^d 1:11 Kainac héna; Inéŋ nimbupuc wamma munia qehumuyec. ^e 1:11 Balam imi Israel ic ionac saec ac zémaŋ zé osiyec. (Qét 22:18, 24:13), Waŋu inéŋ waŋ énéçmiyu Israel ic ieneŋ Anutu ewa hélacnec ménda weleŋ qemigic. (Qét 25:1-3, 31:16). Waŋu Yesuac naléiguc imi héna acac kiwi ic tosaranéŋ Balam imi hémbaoc wamma soukiwa mema saec ac waŋ énéçmiyec zéma ku énéçmiaŋgic. ^f 1:11 Kora imi Datan zéma Abiram iriguc, ic embac hinocgé énéçmima Mose zéma Aron andé uruma ereŋnec sac Anutuac ai ic keçzaoc? Nini momacnec, zéma andé urugic. (Qét 16:1-35, 26:9,10).

énézéma zégic, nalé tetcgiaiguc zédesi ic ieneri hicijima séwiac siŋ niŋac wamma haka ee héihéiya qahac imuhucya méndacma kemmu. ¹⁹Ic imuhucyanéŋ mia onarunec méndéŋ amuma Uŋa Téréya qahac séwi ic kecanzu. ²⁰Ala sorochécna ini mia ninzén ninzén téréya téngéŋ imuac qahaiguc eŋaŋ kekecac ama imi meyacgému. Imuhuc wamma Uŋa téréyaguc héiselima zéwelec wamma kecmu. ²¹Imuhuc wamma Anutuac goi héihéiiguc namma galeŋgé amumu. Waŋu Yesu Kristoac wésé niniŋawac wamma mambéc kegcic kekec hémbénaŋaiguc onagicma keremmac. ²²Ewa éréhéc wamma kecanzu ionac mia wésé niniŋ waŋ énécmimu. ²³Waŋu tosia imi geric bélaŋa igucnec qétak metecgé énécmimu, néŋ séwiginawac siŋ birianéŋ mebirigic séwi usugina idacmi acguc momacnec héŋara mema zénéŋgina hiriyu wésé niniŋ waŋ énécmimu.

**Zéwelecwelec ac zéma mepé
qepési ac.**

²⁴Héŋgaleŋ waŋ énécmiyu qeka meka qahac kegcic edamuyaiguc késpedesic solaŋ zéma ségiségiiguc hai énécmimacac kuha hemizac imi ²⁵neŋaŋ aŋgéŋ titi miŋina Anutu momacguc keczac iwac muru mia miŋ kewunina Yesu Kristoac niŋac wamma edamuya zéma eebipi yanda zéma kuc buŋa zéma qac buŋa yandanéŋ nalé hénihénia qahac imuarunec éréma deguc waŋu nalé tetcgia qahac heheseli hema emma kecmac. Hélacnec!